

OS PLATT

(von Winkels Addo)

Os Platt wöt jeschprooke en dä Rhiinboorel om Lank on Lotem eröm. So jövt et e Neeschter Platt, e Langes-Keeschter, e Elverker, e Schtrömpter, e Ooßem-Bösekoover Platt, on wenn merh well, och e Lootemer Platt. Jellep on Schtrootem jehüüre och doobeej, on die alde Jelleper on Schtrootemer schpräake hüt noch dat alde orjenaale Platt. Buute saare se enfach Länkter Platt doovüür, weil dat os Platt em vröjere Amt Lank so zemlich datselve woor.

Dat Oströotsche on Öödingsch sind van dieselve Zoort Platt. Bloß dat Börker Platt es e bettsche angisch wääje dat doo völl Wööt van Nüss on Düsseldörp dren sind. On dat Kreevelsche es och ganz angisch. Net, dat merh se net vrshton könne, die Börker on die Kreevelsche, nää, äver die hant si eeje Platt.

Noou es et joo wal kloor, dat de Schprook e lebendisch Deng es; on dat weet joo och jeder, on och, dat se sesch verängert, genau wie de Mensche och. En os Heimatblättsches, wo merh "dr Bott" für saare, hant merh al völl son Schtökskes en Platt opjeschreeve. On dann jeng och noch dä Schriit los, wie enkelne Wööt jeschreeve wääde solle.

Bloß möt dat Lääse es et al son Saak. Van die äldere Lütt könne völl noch joot Platt schpräake, tu Huus, op de Schtroot, möt de Nobbere, op de Pos, em Laade, noo de Meß, on överall, wo se sesch bejääjene on sesch et Nöojste tu vrtälle hant. On die nämlige Lütt dont äver Platt net jiiir lääse, weil dat Ärbet es. On dröm hammer os jedeit, merh schpräake son Schtökskes en Platt ens op son kleen Kasset, domöt dat de Lütt, die Platt net so joot oder jaarnet könne, ens hüüre, wie dat rischtisch jeschprooke wöt. On dat se och noch en voffzisch on hongert Joor weete, wie se hütt jeschprooke hant.

Merh wääde al ens jevrocht, ov merh Platt och liire kann. Ja - doodrop mot merh saare, dat van die Tuujetrokene al e ganz Deel Platt vrshton kann, net alles, äver se weete wenistens, woo et sesch dröm jeet. Sojar tuujeloopene Engländer, die heej woone, hant et jeleet - doo bösse van de Söck, wie joot die dat könne. Äver rischtisch Platt schpräake, dovüür mot desch al de Mull jewaaße sin, dat motse al van Kenk av aan mötjekrääje han. On wennse möt die Schollvründe ke Platt jeschprooke häs, oder wenn tu Huus Pap on Mam ke Platt möt desch jeschprooke hant, dann es et schwoor, dat als uutjewaaßene Mensch nootuliire. Meschtens hürt sesch dat e bettsche klöschtisch aan, wie opjesade Kaffe. Escht Platt schpräake kannse net marh so äffkes liire wie jroote Botteramme kleen maake. En twentisch Joor wöt os Platt wal uutjeschtorve sin, weil dat dann bald nömmes mier schpräake kann, on vrshton al ens jaarnet.